

COMUNICATO n. 3870 del 27/12/2025

Manà fora su Trentino Tv l program l vegn endrezà dal Comun General de Fascia

“Pedies”: en sabeda ai 27 de dezember vegn fora la puntata #518 del program ladin per la televizion

[Ladino] Ence chesta setemèna l é a la leta l nef apuntament de “Pedies”, rotocalch ladin de informazion, ruà a la puntata n. 518. I argomenc che vegn portà dant te la puntata de chesta setemèna l é:

Edoardo Felicetti, Procurador del Comun General de Fascia, l ge fèsc i augures de bona festes a duta la jent de Fascia. Apede l porta dant i ejic de na scontrèda fata chisc dis passé, ence coi funzionères de la Provinzia, per fèr fora la costion de la viabilità te Fascia e Fiem per la setemènes de la olimpiades e paralimpiades con si evenc aldò, che più avisa i vegnarà metui a jir dai 6 ai 22 de firé e dai 6 ai 15 de mèrz del 2026. Segur la strèdes no les vegnarà serèdes, aboncont per smendrèr l trafich, ge vel ge conseièr ai ghes de ruèr te Fascia per l Jouf de Ciareja o Pas de Sèn Pelegrin.

Alberta Rossi à portà dant sie nef liber per bec “Stella e la Regina delle Dolomiti”, na doucia contia che ge fèsc viver ai bec n ensomech anter la crepes. Steila, la piccola protagonista che stèsc apede a la Reina de la Dolomites, monc corii de neif e vedudes senza fin, la sperimentea adventures fates de ensomesc, amicizies e mingol de magia. Enceben che l rejone de Nadèl, l é n liber da lejer te cèsa dessema ai picioi dut l an, per tegnir su fora per duc i meisc i sentimenc che caraterisea l dezember: la marevea, la contenteza, l se voler ben e l se respetèr. Tel liber l é ence aprofondimenc sui lesc e i protagonis, informacions de enteres per gregn e picioi, apede ai desseignes de Gianluca Damiano.

Te la rubrica “Svampol ciatarul: jent che fèsc jerveèr sie cunst” sion jic a Selva a cognoscer Ewald Senoner, n artist zis foradeanter. Ewald l à metù ensema sacotanta miniatures da marevea per recordèr fac da zacan e entener miec coche la era con èrc e enjignes da n’outa. Te chesta pruma puntata l ne porta dant desvalives lurieres en cont del forment: coche se frelaa, se fajea farina e tinultima l lurier del pech per far pan.

I reports de chesta setemèna i é stac enjigné e porté dant da Angela Pederiva e Riccardo Zanon.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol, “Pedies” l va fora su **Trentino Tv – canal 10 Prov. de TN**- vigni sabeda da les 18.00 (sie da sera), de domenia da les 13.30 (mesa la does domesdi) e de lunesc da les 11.30 (mesa les doudesc).

L program ades l va fora ence sun **AltoAdige TV – canal 11 de BZ** - vigni domenia da les 18.00 (sie da sera).

Se pel veder duta la puntates ence sul canal YouTube de TV Ladina sot chest link:

<https://www.youtube.com/@TvLadina>

opuramenter se pel veder i servijes un a un su la piata Facebook de TV Ladina
<https://www.facebook.com/TelevijionLadina>

Traduzion di Servijes Linguistics e Culturèi del Comun general de Fascia

(cdt)